

Tuta wulka mucha přileći druhdy ze sylnym bórčenjom z woknom nutř a bje do škleńcow, hdyž won njemóže. Sančka znjese małe hromadki jejkow do mjasu a do sčerba, haj často samo člowjekej do jěťraceje rany. Jara ruče wulahnu so čerwje, kiž su jara nažrane a tak khětře rostu, zo su hižom po 24 hodžinach 200 króc ćežše a po 4—5 dnjach dospołnje wuroscene a měrja tehdy 5 čarkow po dołhosći. Z teho lohcy spoznajemy, čeho dla je w léce w mjasu husto telko čerwjow. Před zadudkowanjom zalězu do zemje, hdžež so do podołhojtokulojteje překi zmoršceneje čwičkojteje dudki čerwjeno-bruneje barby přewobróca. Po 10 abo 12 dnjach přińdže z njeje mucha, kiž bórzy wjacy tysac jejkow znjese. Wone so tak khětře rozplódžuja, zo móže jenički runk muchow za jene léce na 500 millionow muchow napłodzić; teho dla so praji, zo móža něšto muchow tuteje družiny konja skoro runje tak khětře zežrać kaž law. — Podobnje žiwi so tež zelena a kowowje blyščata mucha złota (*Musca Caesar*, Goldfliege).

3) *Mjasowka* (*Sarcophaga carnaria*, Fleischfliege) je skoro tak wulka kaž borkawa, 6 čarkow dołha, šěra, na khribjeće čornosmužkata a na zadnicy čornokóstkowana. Tuta wulka mucha přińdže druhdy do khěžow a znjese jejka, kiž so zwjetša hižom we jejnym žiwoće wulahnu, na mjaso, do hnoja, na sčerba a kaž su pospyty dopokazałe, tež člowjekej do jěťraceje rany. Tajke čerwje zranjeneho člowjeka trašnje čwiluja a jemu wulku bolosć načinja, tola so praji, zo tajke rany bórzy žija. — Dwójkřidlatych překasancow ze swójby prawych muchow (*Muscidae*) je jara wjele, tak derje po družinach, kaž po jenotliwcach. Jich čerwjam podobne dodudki žiwja so z hnijacymi rostlinskimi a zwěrjacymi džělemi a najwjacy tych samych nadeńdže so we khlěwach, we hnoju, na nahnitych łopjenach solotwjowych a kałowych, we cyblach, přezrałym sadže a tež we starym sydru a t. d.

4) *Kutlica konjaca* (*Gastrophilus equi*, Pferde-Magenfliege) je tak wulka kaž pčola. Wuzke, pokončene čělo je wšudžom z brunymi kosmami wobroscene a kóžda wobručka zadnicy ma horkach načorní třihranity blak. Křidle a křidlowej šupizcy